

得預宣傳由茲准量所務是重而准位猶卑祿賜欠少伏望昇進爵級品秩相當臣等商量所定如前謹錄事狀伏聽天裁謹以申聞謹奏聞

大同二年十二月十五日

奪季祿

〔令義解四〕凡應給祿之官若有負犯謂有犯罪也應除免官當被推劾科斷未畢其祿停給待斷訖按定然後給之謂若應當免者依考課令奪當年祿不應當免者仍即給之其私罪下上公罪下中奪半年之祿

〔令集解二十三〕釋云謂准犯應除免官當之徒斷定日不至除免官當故云按定然後給之若見應除

免官當者依考課令奪當年祿耳但未按考之前有私罪下上公罪下中者可給祿考按之後可退奪

何者前令有初條注雖滿限日有中下狀不在給例又文此令既除故也跡云然後給之謂無罪者給

耳問本司預量考第可奪祿者不載祿文否答載申合給但當省考之時按定更合徵耳兵衛合奪祿

者與職事同朱云應給祿官謂別勅才伎長上了後反并兵衛亦同也考課令云凡內外官人准考應解

官者即不合釐事待符報即義解云待報之間不可追事力職田依此案後說是也凡於國司亦准此

條可除免官當者職田事力停給也不待符報但所給追不徵也明未後反云職田事力待符報解官日

停給者穴云非應除免官當者給如常法至考時應徵者乃徵耳大夫云同私案本司考訖以後省未

按以前犯罪斷訖准狀合解及降貶者附按然則奪當年之季祿也後年有犯者乃徵後年耳或云問

才伎長上及兵衛等同職事官哉答師云才伎長上同職事其考同長上故也但兵衛者不同此例何

者番上人故也或云於官當以上兵衛事一同但於考解別耳何者番上人无考解理之故私思順之

又國司可除免官當之人公廨稻者准祿法奉了未知職田事力等何答考解者待符報之間可除免

官當之人覆斷訖後未下官符之前不可取職田事力但職田依田令交替前殖者與先人若交替後

者入後人耳師云在次古記云按考之後若有下狀謂省按考訖未申官間事發者即附校徵已給訖

前祿也考文申官訖發者更追申附按停後應給之祿也若依日不滿而不可給祿者還徵前受之祿